

## ALAHADY FAHA 31 MANDAVANTAONA - B



### Izany no didy voalohany ary ny faharoa dia mitovy aminy ihany koa

Ry Kristianina havana, rehefa nandinika momba ny fiainan-ko avy isika tamin'ny fankalazana ny fetin'ny olomasina rehetra sy ny fibanjinantsika ireo havantsika nialoha lalana antsika tamin'ny 02 novambra teo, izao Alahady voalohany amin'ny volana novambra izao kosa, izay volana eo ny fiainam-pirenentsika Malagasy, dia atolotry ny Eglizy amintsika ny vakiteny telo izay azo lazaina fa mametraka ny fototra maha Kristianina antsika sy ny anjara toeran'ny fivavahana amin'ny fiainantsika andavanandro ary mifanaraka tsara amin'ny fehin-kevitra nasongadina tamin'ny filankevitra pastôraly nataontsika ka nametrahantsika ny hoe aoka ho taranaka mpanorina isika, ho Eglizy Olona Velona sy Eglizy Tranon'Andriamanitra isika. Izany indrindra no lohahevitra tian'ny Eglizy ho dinihantsika dia ny Fitiavana. Io no hahafahantsika mampivelatra ny fifandraisantsika amin'ny tontolo 3 mamaritra ny maha olona antsika. Indrisy anefa simba ny fifandraisantsika amin'ny tontolo iainantsika dia ny zava boahary, simba ny fifandraisantsika samy isika amin'ny tontolom-piainantsika, simba ny fifandraisantsika amin'Andriamanitra dia ny tontolom-pinoana ka

ny hanaremana an'izany no ataontsika dia ny fiainana ny fitiavana miainga avy amin'ny finoana entan'ny fanentanana nentin'I Kristy nandresy ny ratsy.

Matetika ny hevi-diso manjo antsika momba ny fivavahana dia mihevitra isika fa fanatanterahana ny fomba fivavahana

Vakiteny I : Det. 6, 2-6  
Tononkira : Salamo 17  
Vakiteny II : Heb. 7, 23-28  
Evanjely : Mk. 12, 28b-34

toy ny Vavaka isankarazany, ny sakrifisy, ny pelerinajy, ny fanaovana dévotion isankarazany no ataontsika hoe mivavaka. Marina ary anisan'ny fivavahana ireny ary fitaovana manampy antsika amin'ny fivavahana fa tsy ireny no tena fototry ny fivavahana na ny fanatanterahana sy ny fahafantarantsika ny didin'Andriamanitra fotsiny na ny sakramenta ka mahatonga antsika hilaza vita

an'izao, vita raha'jiaby tsy ampy ireny. Ny tena fivavahana izany hoe ny maha-kristianina mpanaradia an'I Kristy ka zary Kristy Mpaira-belona amin'ny olona dia isika mahay mandrindra ny fifandraisana amin'Andriamanitra, ny fifandraisana amintsika samy isika sy ny fifandraisantsika amin'ny zava-boahary ka ny fototr'izany rehetra izany dia ilay voalazan'i Jesoa ao amin'ny Evanjely dia ny fivelomanana an'ireo didy anankiroa izay midika zavatra iray ihany dia ny fitiavana an'Andriamanitra sy ny fitiavana namana. Izany no foto-kevitra amin'izao Alahady faha 31 mandavantaona izao.

Ny vakiteny voalohany ao amin'ny boky Deteronomy mametraka sahadry ny fototry ny fitiavana "Mihainoa ry Israely" tsy afaka hifankatia isika raha tsy misy ny fihainoana. Ho an'ny vahoakan'Andriamanitra ao amin'ny Testamenta Taloha dia tsy mba nisy ny fiekem-pinoana tononina hoatry ny mahazatra antsika amin'izao vaninandro iainantsika izao fa ny fihainoana sy fankatoavana ny Tenin'Andriamanitra no fanehoana ny finoana iainan'izy ireo Tsy mitandre fotsiny fa mampiditra ao am-po ny Tenin'Andriamanitra tahaka ny nataon'i Masina Maria nitahiry izany rehetra izany tao am-po. Ny lohalaharana voalohany eo amin'ny fiainanm-pivavahana nampianarin'Andriamanitra tamin'ny vahoakan'Israely dia ny fihainoana. Toetra tsy maintsy hananan'ny mpivavaka rehetra izany dia ny fahaizana mihaino an'Andriamanitra, mihaino ny Teniny, mahay mihaino ny manodidina anao, Ny manimba ny fiainantsika izao dia ny tsy fahaizantsika mihaino. Matetika manko hita amin'izao vanimpotoantsika izao ny écouteurs tsy afaka amin'ny sofina ka tsy afaka mifampihaino intsony isika satria mihaino izay mahafalifaly sy manaitra antsika fa tsy mitodika amin'ny hafa. Ecouteurs no maro fa tsy Mpihaino nefa ny dikany hoe "écouteur" mpihaino. Mifanohitra amin'izany ny zava-misy noho ny fanompoana ny fandrosoana diso toerana. Aza gaga àry isika raha simba ny tontolo iainantsika satria tsy misy intsony ny fahaizana mihaino, tsy famphaino isika fa mihaino ny tenantsika izany hoe ny fitiavantenantsika . Hitantsika izany amin'ny fiainan'ny fiainakaviana, fiaraha-monina, firenena sy ny fiainan'ny eglizy; Mila fahaizana mihaino ny androntsika izao satria izany no fototry ny fifandraisana. Tsy mahay mihaino ny tontolo iainana isika satria tadavintsika ho fitaovana ho antsika ny tontolo iainana ka ataontsika hazahoana ny filàna fotsiny ka potika ny tontolo iainantsika. Ny tontolom-pinoana dia simba koa noho ny tsy fahaizantsika mihaino ka lasa mikorontana.

Ampianarin'ny Eglizy isika amin'izao Alahady faha 31 mandavantaona izay alahady idirantsika amin'ny novambra, volana hisian'ny fifidianana eto amin'ny firenentsika malagasy ary fototra lehibe amin'ny fiainantsika andavanandro ny fahaizana mihaino. Izany ny làlana amin'ny fampitrahofana ny fiananana andavanandro sy ny finoana.

Ny dingana faharoa amin'ny maha krsitianina Kristy Mpiara-belona amin'ny olona dia ny fitiavana ny namana izay azo lazaina fa tsipika volamena ho an'ny fiainantsika araka ny voalazan'i Jesoa tamin'ilay mpanora-dalàna nanontany azy ny mety ho voalohany amin'ny didy rehetra, hoy indrindra I Jesoa taminy *“Ny voalohany indrindra amin'izy rehetra dia ity: Mihainoa, ry Israely: ny Tompo Andriamanitsika no hany Tompo tokana; koa tiavo ny Tompo Andriamanitrao amin'ny fonao manontolo, sy amin'ny fanahinao manontolo, sy amin'ny sainao manontolo, ary amin'ny herinao manontolo. Izany no didy voalohany. Ary ity no faharoa mitovy aminy ihany koa: Tiavo ny namanao tahaka ny tenanao. Tsy misy didy lehibe mihoatra noho ireo”*. Rehefa *“Dia hoy ilay mpanora-dalàna tamin'i Jesoa : “Tsara izany, ry Mpampianatra, marina indrindra ny nilazanao fa tokana Andriamanitra, ary tsy misy afa-tsy lzy, ka ny tia Azy amin'ny fo manontolo, sy amin'ny fanahy manontolo, ary amin'ny hery manontolo, ary ny tia namana tahaka ny tena, dia lehibe lavitra noho ny sorona dorana rehetra, sy ny fanatitra hafa rehetra”*

Tsy lavitra ny fanjakan'Andriamanitra ianao hoy i Jesoa namaly ilay mpanora-dalàna. Raha te hahita fivelarana amin'ny tontolom-piainana, amin'ny tontolo iainantsika sy ny tontolom-pinoantsika, raha te ho taranaka mpanorina tokoa isika ka eo anivontsika amin'izay fanjakan'Andriamanitra dia anisan'ny fitsipika fototra, fitsipika volamena amin'izany fifandraisana izany ny fitiavana ny namana tahaka ny tena. Izany ho nahatonga an'i Gandhi mpitari-tolona indiana malaza izay nampianatra ny momba ny “non violence”izany hoe tsy mampiasa ny herisetra na oviana na oviana, nahita ny tenin'i Jesoa io dia vaky vavy nilaza hoe “izaho sy ianao dia toy ny tena iray ihany ka, tsy afaka manisny ratsy anao aho raha tsy efa nandà ny tenako nefa izaho tsy afaka handà ny tenako, noho izany izay tianao atao amin'ny tenanao no aoka tanterahinao amin'ny manodidina anao, vokatry izay miova ny fifandraisana. Raha tianao ho tsara ny tontolo iainanao dia tsy hanao tevy ala ianao, tsy handoro tanety ianao, tsy hamelona motro fa hikorokoro sy hanatsara ianao ka hamboly kakazo. Raha tianao hilamina ny fiaraha-monina misy anao dia aoka hifankatia amin'ny namanao ianao. Tsy ampy ny mitia ny namana tahaka ny tena fotsiny satria toa ny tena ihany no jerena fa ao amin'ny testamanta vaovao mampianatra i Jesoa “mifankatiava ianareo toy ny nitiavako ianareo, ataovy izao ho fahatsiarovana ahy “ raha nanasa ny tongotr'ireo mpianay izy. Ka isika Kristianina dia tsy ampy ny fepetra sy ny fanatanterahana ny didy fotsiny fa ny fitiavana maimaim-poana tsy misy takalo tahaka an'i Jesoa manompo no tena fitiavana ary izany no fitsipika faratampony ka iezahantsika amin'ny fiainantsika andavanandro.

Hamafisin'ny taratasy ho an'i Hebrion izany fa i Kristy no tena Mpisorona tsy manam-paharoa ka naneho ny tena fitiavana satria izy masina tsy manantsiny tsy misy mpetina nanaiky ho sorona nanolotra ny tenany ho antsika mba ho fanavotana antsika.

Raha ampiharina amin'ny fiainana andavanandro fa indrindra amin'ny fiainam-pirenena izany rehetra dia azo fintinina tahaka : tsy fitiavan-tanindrazana ny dikany hoe patriotisme andrasantsika rehetra amin'izao fa fahafoizan-tena ho an'ny tanindrazana. Ny fitiavantandrazana dia nationalisme fotsiny. Fa ny patriote dia tsy mahafoy tena ho an'ny tanindrazana. Io indrisy no tsy mbola misy eto anivontsika. Mila Zake ny androntsika izao. : Tompoko, indro ny antsasaky ny fananako omeko ny mahantra, ary raha misy zavatr'olona nalaiko tsy an-drariny dia honerako inefatra hoatra azy.

Ry Kristianina havana, ireo ny fotokevitra atolotra ny Eglizy amintsika amin'izao famaramparanana ny taona litorjika izao rehefa nandinika ny fianan-koavy isika tamin'ny fibanjinana ireo nialoha làlana antsika sy ireo olomasina , ka raha tiantsika ho tena mpanorina tokoa isika dia aoka ivelona ireo hafatra ireo. Aoka ho fitiavana tsy misy takalo, fitiavana maimaim-poana izay nambaran'i Jesoa sy nampianarany ary indrindra nasehony tamin'ny alalan'ny fanolorany ny tenany teo amin'ny hazo fijaliana satria manao démagogie, manao kobakam-bavy izy. Io no naha fola-kevitra an'I Gandhi. Ny fitiavana dia fanompoana, fikatsahana ny soa sy ny tsara ho an'ny hafa ary atao izany handresena ny ratsy, mikatsaka mandrakariva ny soa iombonana sy ny besinimaro izany hany lalana tokona mitondra ny fivelarana ny tontolom-piainana sy tontolo iainana ary ny tontolom-pinoana ka hahatonga antsika tokoa ho soa sy ho tsara ao anatin'ny fiadanan'i Kristy.

Ry Jesoa Tompo ô atorona anay fa tokana ny làlam-piainana dia ny fitiavana ary indrindra ny fitiavana ireo osa sy malemy ka ampio izahay handresy ny fitiavan-tenanay, handresy ny fialonana mahatonga anay manilikilika ny hafa sy manapotika ny tontolo iainanay; Ampio izahay handresy ny avonavona ka hiombona mandrakariva aminao ka hikatsaka ny soa sy ny tsara ary hanatanteraka ny marina eo amin'ny fiainanay. Amen

Mompera Arseveka Mgr Benjamin Ramaroson